

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 गुरुवार

दिनांक 26.12.2024

प्रमुख समाचार –

- राष्ट्रपति ह आज वीर बाल दिवस के मउका म सत्रह झिन लइका मन ल प्रधानमंत्री राष्ट्रीय बाल पुरस्कार ले करीन सम्मानित—कोंडागांव जिला के हेमबती नाग ल घलो दे गीस पुरस्कार।
- प्रधानमंत्री ह काली स्वामित्व योजना के तहत छत्तीसगढ़ समेत दस राज्य के छप्पन लाख ले जादा लोगन मन ल बांटही परिसम्पत्ति कार्ड।
- प्रदेश म महापौर, नगर पालिका परिषद अउ नगर पंचायत अध्यक्ष मनके पद बर काली होवइया आरक्षण स्थगित—आरक्षण के काम होही सात जनवरी के।

राष्ट्रीय बाल पुरस्कार

राष्ट्रपति द्रौपदी मुर्मू ह आज वीर बाल दिवस के मउका म नई दिल्ली म बढ़िया काम करइया सत्रह झिन लइका मन ल प्रधानमंत्री राष्ट्रीय बाल पुरस्कार ले सम्मानित करीन। ए लइका मन म छत्तीसगढ़ के कोंडागांव जिला के हेमबती नाग घलो सामिल हे। ए लइका मन ल कला—संस्कृति, बहादुरी, नवाचार, विज्ञान अउ प्रौद्योगिकी, सामाजिक सेवा, खेल अउ पर्यावरण के क्षेत्र म बढ़िया काम करे बर सम्मानित करे गीस। ए मउका म राष्ट्रपति ह साहिबजादा मनके बहादुरी अउ बलिदान ल नमन करत किहीन कि ए दिन ह श्री गुरु गोविंद सिंह के लइका मनके बलिदान अउ उंखर मनके हिम्मत के सम्मान करे के दिन हरय। राष्ट्रपति ह इनाम पवइया लइका मन ल बधाई देवत कहिन कि एखर मनके सफलता ह जम्मा लोगन मन ल आगू बढ़े बर प्रेरित करथे।

कोंडागांव जिला के जूडो खिलाड़ी हेमबती नाग ल खेलो इंडिया अउ राष्ट्रीय स्तर के प्रतियोगिता म बढ़िया प्रदर्शन करे के सेती ए पुरस्कार दे गीस। ओखर सफलता उपर मुख्यमंत्री ह हेमबती ल सुभकामना दे हवय।

वीर बाल दिवस—प्रधानमंत्री

प्रधानमंत्री नरेन्द्र मोदी ह कहिन हे कि भारत के लोकतंत्र के फैलाव ह गुरु मनके शिक्षा, साहिबजादा मनके बलिदान अउ देस के एकता के मूल मंत्र उपर आधारित हे। आज नई दिल्ली म वीर बाल दिवस समारोह ल संबोधित करत प्रधानमंत्री ह कहिन कि गुरु मनके परंपरा ह हमन ल सामान आदर के संग देखे के शिक्षा देहे अउ देस के संविधान ह घलो इही विचार बर प्रेरित करथे।

प्रधानमंत्री ह कहिन कि संविधान ह लोगन मन ल देस के संप्रभूता अउ एकता ल सबले उपर राखे के सिद्धांत के सीख देथे। ए मउका म प्रधानमंत्री ह सुपोषित ग्राम पंचायत अभियान के घलो सुभारंभ करीन। अभियान के उद्देश्य पोषण ले जुड़े सेवा मन ल मजबूती ले लागू करना हवय।

वीर बाल दिवस के मउका म प्रदेश म घलो आज कतकोन कार्यक्रम करे जात हे। मुख्यमंत्री विष्णुदेव साय ह वीर साहिबजादा मनके बलिदान ल सुरता करत कहिन कि ए दिन सिख पंथ के दसवां गुरु, गुरु गोविंद सिंह के साहिबजादा मन ह देस के रक्षा बर अपन प्राण गवां दीन।

प्रधानमंत्री—स्वामित्व योजना

प्रधानमंत्री नरेन्द्र मोदी ह काली स्वामित्व योजना के तहत छप्पन लाख ले जादा परिसम्पत्ति कार्ड बांटही। ए मउका म प्रधानमंत्री ह योजना के फायदा पवइया लोगन मन ले गोठबात करही। केन्द्रीय पंचायती राज मंत्रालय कोति ले दस राज्य अउ दू ठिन केन्द्रसासित प्रदेश मनके करीबन पचास हजार गांव मन म स्वामित्व संपत्ति कार्ड बांटे जाही। ए राज्य मन म छत्तीसगढ़ घलो सामिल हे। योजना म ग्रामीण आबादी के बसावट वाले क्षेत्र मन म परिसम्पत्ति के मालिक मन ल भूईया के दस्तावेज दे जाही।

मुख्यमंत्री विष्णुदेव साय ह धमतरी म होवइया कार्यक्रम म स्वामित्व सम्पत्ति कार्ड दीहीं।

निकाय चुनाव—आरक्षण

प्रदेश म नगरीय निकाय चुनाव बर नगर पालिक निगम मनके महापौर, नगर पालिका परिषद अउ नगर पंचायत अध्यक्ष मनके पद बर काली होवइया आरक्षण ल स्थगित कर दे गेहे। नगरीय प्रशासन अउ विकास विभाग के संचालक कुंदन कुमार ह ए बारे म अधिसूचना जारी कर देहे। एखर मुताबिक अब सात जनवरी के आरक्षण के काम रायपुर के साईंस कॉलेज परिसर स्थित पंडित दीनदयाल उपाध्याय ऑडिटोरियम म बिहनिया ग्यारह बजे ले होही।

अटल परिसर—आधरशिला

पूर्व प्रधानमंत्री अटल बिहारी वाजपेयी के जयंती सुशासन दिवस के मउका म काली प्रदेश के एक सौ बैसठ नगरीय निकाय म अटल परिसर निर्माण के आधारशिला राखे गीस। ए मउका म मुख्यमंत्री विष्णुदेव साय, विधानसभा अध्यक्ष डॉक्टर रमन सिंह अउ उपमुख्यमंत्री अरुण साव ह वर्चुअल रूप ले जुडीन। इही कड़ी म कोरबा जिला म श्रम मंत्री लखनलाल देवांगन ह अटल परिसर निर्माण काम के सिलान्यास करीन।

मुख्यमंत्री—जशपुर

मुख्यमंत्री विष्णुदेव साय ह आज जशपुर जिला के घुघरी गांव म नागवंशी समाज डहार ले राखे गे आदिवासी गौरव सम्मेलन म सामिल होइन। ए दउरान मुख्यमंत्री ह बगीचा म एक करोड़ रुपिया के लागत ले सामाजिक भवन बनाय के घोसना करीन अउ संगेसंग तीन एकड़ जमीन के पट्टा दीन। ओमन बतईन कि राज्य सरकार ह नवा रायपुर म आदिवासी समाज बर आदर्श रहे लोगन मन ले जुड़े एक ठिन संग्रहालय बनाय हे, जेखर लोकार्पण जल्दीच प्रधानमंत्री करही। कार्यक्रम म मुख्यमंत्री ह आदिवासी लइका मन ल जाति प्रमाण पत्र बांटीन।

सहकारी समिति—शुभारंभ

सहकारिता मंत्री केदार कश्यप ह काली जगदलपुर म राज्य के तीन सौ ले जादा नवा बने बहुउद्देशीय पैक्स, डेयरी अउ मतस्य सहकारी समिति मनके वर्चुअल रूप ले शुभारंभ करीन। ए मउका म ओमन किहीन कि अभी प्रदेश म काम करत दू हजार अंठावन पैक्स के संगेसंग लैम्स डहार ले किसान मन ल कृषि ऋण अउ खातू—बीजा जइसन सेवा दे जात हे। राज्य म पांच सौ नवा बहुउद्देशीय पैक्स बनाय जाही। ओमन बतईन कि संतावन ठिन नवा दुग्ध समिति मनके पंजीयन कर ले गेहे। त उहें, एक सौ तेरह वन—धन समिति मन ल प्राथमिक बहुउद्देशीय लघु वनोपज सहकारी समिति के रूप म पंजीकृत करे गेहे। ए मउका म बस्तर के दस ठिन नवा सहकारी समिति मन ल पंजीयन प्रमाण पत्र, पच्चीस झिन किसान मन ल रूपे किसान क्रेडिट कार्ड अउ दुग्ध उत्पादक सहकारी समिति “बड़े कापसी” ल माइक्रो एटीएम दे गीस।

जानबा के मुताबिक केन्द्रीय सहकारिता मंत्री अमित शाह ह काली नई दिल्ली म होय कार्यक्रम म देसभर के नवा बने दस हजार ले जादा बहुउद्देशीय पैक्स, डेयरी अउ मतस्य सहकारी समिति मनके सुभारंभ करे रिहीन।

माओवादी—आत्मसमर्पण

नारायणपुर जिला म एक झिन माओवादी ह पुलिस के आगू आत्मसमर्पणकरे हे। ए माओवादी कुतुल एरिया कमेटी के गुमरका जनताना सरकार म उपाध्यक्ष के पद म काम करत रिहीन अउ पाछु आठ साल ले माओवादी संगठन मन म सक्रिय रिहीन। एखर उपर ओरछा, गीदम अउ बारसूर म आने—आने माओवादी गतिविधि म सामिल रहे के आरोप हे। आत्मसमर्पण करइया माओवादी ल राज्य सरकार के पुनर्वास नीति के तहत पच्चीस हजार रुपिया के प्रोत्साहन राशि दे गीस।

गांजा—बरामद

महासमुंद जिला के बलौदा पुलिस ह एक सौ चौंसठ किलो गांजा के संग दू झिन आरोपी मन ल आज गिरफ्तार करे हे। जब्ती करे गे गांजा के कीमत करीबन बत्तीस लाख अस्सी हजार रुपिया बताय गेहे। पुलिस के मुताबिक ट्रक म गांजा लेके दू झिन आरोपी ह ओड़िशा ले राजस्थान जावत रिहीन। मुखबिर ले सूचना मिले के बाद बलौदा पुलिस ह सिरपुर फारेस्ट नाका के तीर ट्रक ल रोक के जांच करीन। ए दउरान छह ठिन बोरी म रखे गांजा बरामद करे गीस। दूनों आरोपी मध्यप्रदेश के रहइया हरय।

नेता प्रतिपक्ष—राज्यपाल पत्र

नेता प्रतिपक्ष डॉक्टर चरणदास महंत ह राज्यपाल रमेन डेका ल चिट्ठी लिखके छत्तीसगढ़ विधानसभा के शीतकालीन सत्र म पारित छत्तीसगढ़ नगर पालिका संशोधन विधेयक—ग्यारह अउ बारह ल संविधान विरुद्ध बताय हे। ओमन एमा जरूरी कार्यवाही करे के बिनती करे हे। डॉक्टर महंत ह किहीन कि दूनों विधेयक के पारित होय के बाद पांच बछर के अवधि के पहिली नवा चुनाव कराय के बाध्यता ल खतम करके छह महीना के उपरहा बेरा म अनुज्ञेय हो जही, जउन ह असंवैधानिक हरय।

मौसम

उत्तरी छत्तीसगढ़ के एक—दू जघा म काली गरज—चमक के संग हल्का ले मध्यम बरसा होय के संभावना हे। त उहें, बस्तर संभाग अउ ओखर ले लगे जिला मनके एक—दू जघा म घलो हल्का बरसा हो सकथे। मौसम विभाग के मुताबिक पश्चिमी विक्षोभ के प्रभाव ले ए बेरा मौसम म बदलाव होय हे। हवा के दिसा बदले ले बंगाल के खाड़ी ले जादा मात्रा म नमी आवत हे, जेखर सेती प्रदेश म अवइया दू दिन तक हल्का बरसा होय के संभावना बने हे।